

Wasse Sach mett unserne Strooße

Om letzde Sunndaach om Stommdisch hott de Schorsch zu mir gesacht: Honnes, wasde deletzt ferr die nei Grawestrooß befürcht host, habb ich die vorsch Woch in de Eisebohstrooß erlebt.

Ei Schorsch, habb ich gefroocht, was war dann dess?

De Schorsch hott erst noch enn Schluck Äbbelwoi genumme unn dann erzählt: Dess Kättche unn ich, mir sinn mettem Audo dorch die Erzberjerstrooß gefahrn unn wollde nooch Hochem. Ich habb on de Flerschemer Zeidung nooch rechts um die Eck geguckt unn weil die Barrier zu war unn ich nit warte wollt, saach ich zum Kättche, mir fahrn dorch die Eisebohstrooß. Ich war noch nit richdisch drin, habb ich schunn Sch... Schade gerufe, awwer es war schunn zu spät. Unn weil dess doch jetz e Oibohnstrooß iss, konnt ich nimmi rickwärts eraus, außerdem war schunn gleich e onner Audo hinner merr.

Warum hosde dann so e beeß Wort gekrische?, hott de Karl de Schorsch gefroocht.

Ei weil wie weit ich gucke konnt enn Stau in de Eisebohstrooß war. Unn ich habb aach gleich geseh warum: Gonz vorne isses Müllaudo belade worrn. Unn dess konnd nor vorm Modeparadies e paar PKWs vorbeilosse, sunnst war joo die gonz Strooß zugeparkt.

Ich habb gegrint: No, Schorsch, uff oomol hosde dann vill Zeit gehabt, odder?

Vill Zeit, Honnes. Nooch fast zeh Minutte war ich om Parkplatz om Sängerheim. Dort iss grad ooner erausgefahrn unn weil die Fraa in die Abedek musst, habb ich mich uff dem soin Platz gestellt. Waaßde, wie ich merr vorgestell habb, dass ich noch fast e Verrdelstund innere Audoschlong hinner dem Müllaudo herfahrn, enn Haufe Sprit verbrauche unn dene Leit in de Eisebohstrooß die Luft verpeste det, habb ichs Audo stehe losse unn mir sinn in die Abedek gonge. Dort hadde merr noch e Fraa aus de Nochberschaft getroffen. Unn als merr nooch villeicht zeh Minutte uff de Parkplatz zurickkumme sinn, war die Schlong noch immer doo. No ja, doo hawwe merr uns ins Audo gesetzt unn gewart, unn wie dann die Strooß frei worrn iss sinn merr weider gefahrn.

De Karl frächt: Was wär dann gewese, wenn zu der Zeit enn Kronkewaache in die Eisebohstrooß gemusst hätt?

Ich saach: Dann hätt dess Müllaudo Platz mache unn weiderfahrn misse.

De Karl hott de Kopp geschittelt. Awwer woher hädde die dess mettem Kronkewaache wisse solle? Die warn doch weit weg unn hädde nix defoo geseh odder geheert?

De Schorsch druff: Ja Karl, doo hätt ooner von de Sanitäter zu dene Müllmänner hie laafe misse. Awwer dann hätt's doch e Zeitlong gedauert, bis all die onnern Audos aach aus dere Strooß erauskumme wärn. Wie de Honnes doomols gesacht hott: Merr misst in de Flerschemer Zeidung lese kenne, um was ferr Zeit dess Müllaudo dorch die Eisebohstrooß fährt, dann kennt merr zu der Zeit iwwer die Wickerer odder villeicht sogar iwwer die Edderschemer Strooß aus Flerschem enaus fahrn. Odder merr misst e Ompel oirichde, vorne om Norma, die blinke det, doo wisst merr aach dasses long dauert. Wer dann in die Eisebohstrooß enoifährt iss noochher selbst droo schuld.

Moont de Karl: Wasse Sach mett unserne Strooße! Weil wenn die nei Grawestrooß ferdisch iss, misst merr dess bei der aach mache. Sunnst kriecht merr dort de selwe Stress.

Eiern Honnes